





# **Акафист**

## **святому преподобному**

## **Трифону, Печенгскому**

## **чудотворцу**

### **Кондак 1**

---

Избравшу тя Пастыреначальнику Христу во апостола страны северныя, абие отринул еси, досточудне Трифоне, мира сего красная, претерпел же всяко озлобление, благовестил еси сидящим во тме и сени смертней Бога явльшагося плотию: темже со апостолы срадуется дух твой в небесных обителях. Имея убо дерзновение ко Христу Богу нашему, от всяких бед избави нас зовущих: Радуйся, Трифоне, страны северныя просветителю, Печенгский чудотворче.

### **Икос 1**

---

Ангелы Своя странам и языком предстатели даровавый Бог, егда прииде времен исполнение, моления ради ангела страны, яже близ океана

хладна, и народа лопска предстателя, призва тя  
во благовестие, всехвальный Трифоне, яко да  
спасени будут людие тии. Поминающе убо сия,  
вопием ти:

Радуйся, священнаго корене благое прозябение.

Радуйся, пустынным издетска житием сосуд  
избран себе Богови уготовавый.

Радуйся, зван быв свыше, к океану морю  
преселивыйся.

Радуйся, во Христе грядущее избавление тамо  
благовестивый.

Радуйся, поспешествующей ти благодати  
Божией, приведый ко Христу чад множество.

Радуйся, совершенною Христа любовию  
уязвився, образ по сем иноческий на себе  
приемый.

Радуйся, Троицы Живоначальная обитель  
устроивый, и яже ко Христу монахов  
ликостояния.

Радуйся, велия ради смирения от начальства  
над обителию отрекийся, повелевая зверьми  
дивиими.

Радуйся, течение свое святолепне скончав,  
благочестне ко Христу отшедый.

Радуйся, яко обитель твоя, от враг разоренная,  
по словеси твоему паки возставится.

Радуйся, по преставлении твоем царя Феодора спасый и всем потребная скоро подаваяй. Радуйся, Трифоне, страны северныя просветителю, Печенгский чудотворче.

### **Кондак 2**

---

Видяща родителя твоя, досточудне Трифоне, издетска постническое твое житие, аще и стужастася о твоем терпении, обаче радовастася, проразумевающа, яко хочет Господь воздвигнути тебе нова миру светильника, и Тому воспеваста: Аллилуиа.

### **Икос 2**

---

Разум свыше осени тя, преподобне, всего себе предати Христову изволению, имже в пустыню приведен был еси: тамо бо найде на тя Сила Божия, во еже благовестити Евангелие Христово народу иному. Темже вопием ти: Радуйся, иереа Божия радости и матери твоея веселие.

Радуйся, родителей честных чадо, от Бога зело возлюбленное.

Радуйся, девство драгое и чистоту душевную соблюдый непорочны.

Радуйся, издетска в дому Божии, аки Христос

отрок, приметатися изволивый.  
Радуйся, услышавый тамо слово реченное:  
пустынным живот сокровен есть, божественным  
речением воскрисяющымся.  
Радуйся, оным гласом, яко воин, на служение  
Царю призванный.  
Радуйся, пустынным житием себе в добром  
изволении утвердивый.  
Радуйся, во юности плотския страсти  
умертвивый.  
Радуйся, постом душу свою, во еже глас свыше  
слышати, предочистивый.  
Радуйся, от Христа языку лопску избранный  
благовестниче.  
Радуйся, еже о мире сем отложивый попечение и  
абие вослед Христу последовавый.  
Радуйся, Трифоне, страны северныя  
просветителю, Печенгский чудотворче.

### **Кондак 3**

Силою во еже благовестити, свыше Христос  
облече тя, досточудне Трифоне. В пустыни бо,  
аки Моисеови древле в купине, глас ти бысть:  
«Иди в землю необетованную и рцы, яко любы  
обручения Моего не разорится». Егда же рекл  
еси: «Кто еси Господи»; отвеща ти: «Иисус Есмь,

Егоже ты ищещи». Сия же слышав, со умилением преклонься, возопил еси Тому: Аллилуиа.

### Икос 3

---

Имущу ти, аки Моисей, смирение велие, во еже отрещися такова звания, рекл еси, преподобне: «Невежда есмь, Господи, и малокнижен». Обаче Той заповеда ти: «Ничесоже вопреки глаголи, яко на вся пошлю тя, и идеши. вся, яже заповедаю ти, глаголи, не убойся, с тобою бо Есмь». Сего ради вопием ти: Радуйся, радости родителей твоих оправдание. Радуйся, видеый славы Отчия сияние. Радуйся, яко благодать Божия излилася на тя богатно.

Радуйся, яко разумение ти языков дадеся. Радуйся, яко найде на тя дух премудрости и ведения.

Радуйся, Духа Святаго приятелище. Радуйся, силою Божиею аки мечем препоясанный.

Радуйся, яко рыбарь ко океану на уловление душ человеческих во спасение призванный.

Радуйся, Андреа Первозванного, на горах Киевских благовестника ревнителю.

Радуйся, Мефодиа и Кирилла избранный последователю.

Радуйся, Гуриа и Варсонофия, Стефана и Иннокентиа достойный преемниче.

Радуйся, Трифоне, страны северныя просветителю, Печенгский чудотворче.

#### **Кондак 4**

---

Бури океана хладна не убоявся, любовию Христовою согреваемь, во страну северную преселился еси, досточудне Трифоне, да предложиши тамо народу Лопску огонь любви Божия, хлад и мрак души разгоняющ, во еже чистым сердцем и усты воспевати: Аллилуиа.

#### **Икос 4**

---

Слышаще идолов посрамление от тебе, злочестивии людей сих учителяе, кебуни нарицаеми, злобу велию воздвигоша на тя, преподобне, по ланитома биюще, по каменем влачаще, и ины пакости деюще. Мы же зряще тя, со смирением таковая приемлюща, умильно вопием:

Радуйся, яко купец многоценна ради бисера ко океану устремивыйся.

Радуйся, ввергий мрежу свою на уловление душ

во спасение.  
Радуйся, тщету идолов обличивый.  
Радуйся, сего ради аки Павлово от иудей  
страдание приемый.  
Радуйся, яко слово Божие светлостию лица  
твоего утверждашеся.  
Радуйся, яко слово твое пройде в сердца  
окамененная.  
Радуйся, от Бога создание всея твари из  
небытия народу лопарску возвестивый.  
Радуйся, благовестивый сим людем во Адаме  
наше падение, во Христе же обновление.  
Радуйся, отринувенныя Христовым обручением  
утешивый.  
Радуйся, благовестием твоим небесныя лики  
возвеселивый.  
Радуйся, ангела предстателя страны северныя  
себе явивый.  
Радуйся, Трифоне, страны северныя  
просветителю, Печенгский чудотворче.

### **Кондак 5**

Боготечней звезде уподобився, всю страну  
северную обтекл еси, досточудне Трифоне. Яко  
бо денница, солнцу преходящая, от языка  
лопска привел еси ко Христу чад множество,

иже со умилением сердца приемше крещение,  
возопиша о тебе Богу: Аллилуиа.

## Икос 5

Видение бе дивное, егда от мрачна неведения  
тобою приведеннии Христови сочеташася: земля  
бо и небо ликовашу, во струях Печенги, аки  
Иордана и Днепра, зряща множество  
крещаемых. Поминающе убо сия, восклицаем  
ти:

Радуйся, гласе вопиющаго, от народа лопска  
услышанный.

Радуйся, Крестителя Христова собеседниче.

Радуйся, яко тма идольская от тебе разорися.

Радуйся, яко крест, аки знамя победное, тобою  
зде водрузися.

Радуйся, яко трапеза бесовская ни во что же  
тамо вменися.

Радуйся, яко вместо тоя утвердися тамо трапеза  
Христова спасительная.

Радуйся, тобою бо Матерь Божия прославися.

Радуйся, яко святии просвященным тобою  
людem присни сташа.

Радуйся, яко Владимир святой, зря чад  
умножение, возвеселися.

Радуйся, в распутиях мира сего обрeтый на

вечерю Христову избранныя.  
Радуйся, Церкви от народа лопска создателю.  
Радуйся, Трифоне, страны северныя  
просветителю, Печенгский чудотворче.

### Кондак 6

---

Егда проповедано бысть Евангелие всей  
стране северней, ин подвиг приял еси на себе,  
досточудне Трифоне. Языку бо крещену бывшу,  
абие прием образ ангельский, создал еси обитель  
Живоначальныя Троицы, в нюже стечеса инок  
множество, во еже пети Богу: Аллилуиа.

### Икос 6

---

Возсия во мраце Севера, яко светильник  
света невечерняго, обитель от тебе созданная,  
светом Троическим вся осиявающая. Темже  
радующеся вопием ти:  
Радуйся, апостолом веселие, преподобным же  
удобрение.  
Радуйся, кукулем, аки венцем незлобия, главу  
свою увязивый.  
Радуйся, поясом чресла своя во умерщвление  
плоти препоясавый.  
Радуйся, Иоанну Богом возлюбленну  
поревновавый.

Радуйся, нестяжания учителю.  
Радуйся, смирения великаго носителю.  
Радуйся, каменю, на немже создася жилище  
Пресвятыя Троицы.  
Радуйся, в жилищих тмы селение света  
невечерняго соделавый.  
Радуйся, яко возстена князь мира сего, зря  
воинства Христова водворение.  
Радуйся, яко zde ста колесница, Иезекиилем  
созерцанная.  
Радуйся, яко вознесся сидящему на ней песнь  
великая, в вышних песнословимая.  
Радуйся, Трифоне, страны северныя  
просветителю, Печенгский чудотворче.

### **Кондак 7**

---

Хотяй чада своя препитати и спасти, егда  
глад стране прилучися, блаженному Гурию  
предал еси, досточудне Трифоне, обитель от тебе  
созданную, сам же изшед во Отечество,  
осмерицу лет по градом тамо прехождал еси,  
даяния блага приемля и поя Богу: Аллилуиа.

### **Икос 7**

---

Новую купель Силоамскую яви тя Бог,  
преподобне, егда странен сый во Отечествии,



Темже последи той, приемль тя любовию, всякаго исполни даяния, поя Богу: Аллилуиа.

## Икос 8

Весь благоговеинства исполнився, в тое же время царевич Феодор, изшед от церкви, посла ти, преподобне, одежды своя, яко да милостыня его предъидет царскому даянию, еже и бысть по сем велие. Темже вопием ти:  
Радуйся, смирения ради вознесенный.  
Радуйся, сильным мира сего явленный.  
Радуйся, яко царь пришествию твоему удивися.  
Радуйся, яко явлением двою той возвеселися.  
Радуйся, от царя достойне почтенный.  
Радуйся, от сына царева одаренный и возлюбленный.  
Радуйся, от напастей сего выну соблюдавый.  
Радуйся, яко милостынею его обитель твоя снабдесея.  
Радуйся, яко благочестием его царство Российское увеселися.  
Радуйся, яко царство наше цари благочестивыми украшается.  
Радуйся, яко святыми мужи оно утверждается.  
Радуйся, Трифоне, страны северныя просветителю, Печенгский чудотворче.

## Кондак 9

---

Всяких дарований исполнен сый, паки во страну северную, аки солнце к захождению, притек, досточудне Трифоне, создал еси церковь благоверных князей Бориса и Глеба, и оставль обитель, в дольней пустыни водворився, остаток дний своих препроводил еси в терпении мнозе, поя Богу: Аллилуиа.

## Икос 9

---

Витии от инок дивное еже ти тварей повиновение всюду возвестиша, преподобне: не сущу бо ти единожды в келлии, зверь дивий в ню вниде и начат бывшая ясти. Возвращшу же ти ся и наказавшу сего, николиже паки ко обители твоей от тацех приближаться смеяше. Сему же чюдящеся, взываем ти: Радуйся, ластовице пустыннолюбивая. Радуйся, Успенския пустыни украшение. Радуйся, молчания образе. Радуйся, прилоги лукаваго уразумевый. Радуйся, гордыни его не приложивыйся. Радуйся, стрелы того безсильны явивый. Радуйся, в конец сего посрамивый. Радуйся, Адаму первозданну уподобивыйся. Радуйся, яко тя зверие дивии царя себе

познаша.

Радуйся, от земнородных прозябение дивное.  
Радуйся, кораблю великий, ко пристанищу  
тихому приближивыйся.  
Радуйся, Трифоне, страны северныя  
просветителю, Печенгский чудотворче.

### **Кондак 10**

---

Спасти хотя собранныя, прежде кончины  
твоя досточудне Трифоне, паки во обитель  
твою прешел еси, и Богови служение заповедал  
еси братии: юже грядущаго ради озлобления  
Христовым утешив милосердием, в небесныя  
кровы отшел еси, идеже со святыми поеси Богу:  
Аллилуиа.

### **Икос 10**

---

Стена был еси чадом обители твоя,  
преподобне, иже со умилением поюще  
надгробная, положиша святое тело твое, якоже  
заповедал еси, в пустыне тобою возлюбленной  
Зряще же оное токи чудес источающее,  
радостно возопиша:  
Радуйся, Пресвятая Троицы изрядный  
почитателю.  
Радуйся, Девы Преплагословенныя ублажателю.

Радуйся, святым Зосиме, Савватию и Герману единоправный.

Радуйся, добре Богови поживый.

Радуйся, в старости мастите ко Христу преселивыйся.

Радуйся, яко глава твоя, приклонена суци, труды извествоваше.

Радуйся, седина бо твою мудрость обличаше.

Радуйся, таланты, от Бога ти вданная, приумноживый.

Радуйся, благий рабе, вшедый в радость Господа твоего.

Радуйся, честных монахов похвало и украшение.

Радуйся, обители твоя присный Богови предстателю.

Радуйся, Трифоне, страны северная просветителю, Печенгский чудотворче.

### **Кондак 11**

---

Пение всеумиленное приносим ти, досточудне Трифоне! Обитель бо твоя, аще по словеси твоему от свеев разорися, обаче страданием братий прославльшися, паки возставися. Аще и вторицею опусте, силою же лучшею ныне обновися, в нюже иноцы текуще, о тебе

радостно Богови поют песнь немолчную:  
Аллилуиа.

## Икос 11

Светозарней звезде уподобися обитель твоя,  
преподобне, егда ю свее разоряху: чада бо,  
тобою собранная, терпением враги посрамиша,  
венцы мученическими украсишася, и купно с  
церковию огнем попалившася, яко жертва  
угодна Богови принесошася. Поминающе убо  
таковая, умильно вопием ти:  
Радуйся, грядущая в Бозе созерцай.  
Радуйся, обители разорение предъявивый.  
Радуйся, до времени ю вои небесными  
соблюдавый.

Радуйся, яко ученик твой Иона, молитвами тя  
выну чтый, в пустыни твоей от меча скончася.  
Радуйся, Гуриа, Германа и иных прославленных  
Богом подвижников веры и благочестия  
наставниче.

Радуйся, яко вся чада твоя от Христа прияшася.  
Радуйся, яко обитель твоя паки возставися.  
Радуйся, яко паки тем светильник благочестия  
страны даровася.  
Радуйся, тою лжеучения сокрушаются.  
Радуйся, святые бо твоя мощи аки камень

краеуголен являются.  
Радуйся, яко вся коемуждо полезная молитвами  
твоими даруеши.  
Радуйся, Трифоне, страны северныя  
просветителю, Печенгский чудотворче.

## Кондак 12

---

Благодати Христовы носителю, досточудне  
Трифоне! С верою тя призывающым полезная  
подаеши, от напастей же, яко царя Феодора,  
скоро избавляеши. Сему бо нощию явився во  
стане, рекл еси: «Скоро изыди, да не найдет на  
тя смерть нечаянная». Сия же сотворшу ему,  
абие от стреляния вражеска скиния  
опровержеся и ложе разметася, людие же  
чудящеся пояху: Аллилуиа.

## Икос 12

---

Поюще Богу песнь благодарения, радуемся о  
тебе, преподобне, яко вся нам полезная  
даруеши. Тобою бо пагуба отгоняется, здравие  
улучается, мир и благоустроение водворяется:  
понеже на небесех присно ходатайствуеши о  
нас, ти сице:  
Радуйся, на небесех о нас теплый предстателю.  
Радуйся, почитающих тя верный хранителю.

Радуйся, не чтущих тебе вразумителю.  
Радуйся, духов злобы отгонителю.  
Радуйся, помраченных умы просветителю.  
Радуйся, недугов изрядный целителю.  
Радуйся, от потопления морского спасателю.  
Радуйся, яко тобою царю Феодору даровася  
избавление.

Радуйся, яко тобою небесное царей наших  
познася соблюдение.  
Радуйся, яко тобою всяка печаль отгоняется.  
Радуйся, яко тобою благочестие во обители твоей  
и по всей стране сей утверждается.  
Радуйся, Трифоне, страны северныя  
просветителю, Печенгский чудотворче.

### **Кондак 13**

О преподобне и досточудне отче наш  
Трифоне! Живоначальной предстоя Троице, в  
неприступнем свете и радости неизглаголанней,  
приими сие от умиленного ти сердца возносимое  
хваление, и не престай моляся о нас, да  
поживше благочестне, по успении нашем  
сретени от тебе обрящемся на небесех, и  
воспоем Богови со ангельскими лики: Аллилуиа.

(Этот кондак читается трижды, затем икос 1-  
й и кондак 1-й)

## Молитва

О Всесвятая Троицы угодниче, о блаженнейший и равноапостольный пастырю, преподобне отче наш Трифоне! Не забуди твоя паствы, поминай во святых твоих и богоприятных молитвах, приносимых в Троице славимому Богу, стадо твое, еже сам, по благовестию от ангела, пришествием твоим собрал и упасл еси. Понеже в сродстве твоего мирскаго жилища, слышав во святей церкви на утрени поющих: «Пустынным живот сокровен есть, божественным рачением воскриляющымся»; и от того восперився божественною любовью, оставль дом и сродство, и пришед вскрай северныя страны, просветил еси святым крещением неведущий Творца, всех Бога, лопарский народ, за еже, во утверждении христианския веры, многа изгнания и зоключения подъял еси. И близ реки Печенги в пустыню вселився, братию из многих градов и весей собрав, велию обитель воздвигл еси, и при отшествии к небесным селением, о посещении твоя обители пророчества дар от Бога восприял еси, и по смерти на мори и на суши многа чудеса и цельбы с верою просящим сотворил еси и ныне твориши. Темже молим тя,

не забуди присещати чад твоих: моли за ны, преподобне отче, приходящия к тебе с верою, и за вся христианы, яко имеяй дерзновение к Безсмертному Царю Христу всех Богу. Не премолчи за ны ко Господу, и не презри нас верою и любовью чтущих тя и поминающих святую память твою. Аще бо ты и преставился еси от нас телом, но и по смерти живый духом, всегда чудодействуеши. Молитвами твоими сохраняй нас от стрел и козней вражиих, и всякия прелести бесовския, и от враг видимых и невидимых. Пастырю наш добрый! Аще мощи твоя в раце незрими нам суть, обаче, понеже всегда в Троице славимому Богу, при Престоле Его непостижимаго величества неотступно в молитвах предстоиши, усердно к тебе прибегаем и просим: умоли и испроси нам время к покаянию, да в час исхода души преждем от земных к небесным, мытарств же воздушных и вечныя муки избавимся, и Небесному Царствию наследницы будем со всеми от века угодившими. О всеблаженне отче наш Трифоне! Не презри и ныне нас, притекающих к тебе, яко да молитвами твоими и помощию спасаеми, славу и благодарение, хвалу и поклонение за вся в Троице единому Богу, всех Создателю

возсылаем, Отцу и Сыну, и Святому Духу, ныне  
и присно и во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**